

摘藻堂四庫全書薈要

子部

欽定四庫全書薈要

子部

御定廣羣芳譜卷四十

詳校官主事_臣陳本

欽定四庫全書薈要卷一萬六百三子部

御定佩文齋廣羣芳譜卷四十

花譜

巖桂

按牡桂箇桂入藥巖桂不入藥原合為一載入藥譜今分巖桂入花譜牡桂箇桂別見藥

譜

原巖桂似箇桂而稍異葉有有鋸齒如枇杷葉而麤澀

者有無鋸齒如梔子葉而光潔者叢生巖嶺間謂之巖

桂俗呼為木犀

紋理如犀故名木犀

其花有白者名銀桂黃者名

金桂紅者名丹桂有秋花者春花者四季花者逐月花者花四出或重臺徑二三分瓣小而圓皮薄而不辣不堪入藥花可入茶酒浸鹽蜜作香茶及面藥澤髮之類天竺桂即今閩粵浙中山桂台州天竺最多生子如蓮實或二或三離離下垂天竺僧稱為月桂其花時常不絕枝頭葉底依稀數點亦異種也

彙考增晉書陸機傳論蘭植中塗必無經時之翠桂生幽壑終保彌年之丹原唐書五行志垂拱四年三月

雨桂子於台州旬餘乃止 增唐書后妃傳太宗賢妃

徐惠八歲自曉屬文父孝德嘗試使擬離騷為小山篇
曰仰幽巖而流盼撫桂枝以凝想將千齡兮此遇荃何
為兮獨往孝德大驚知不可掩于是所論著遂盛傳太
宗聞之召為才人 山海經招搖之山其上多桂 臯
塗之山上多桂木 呂氏春秋物之美者招搖之桂

禮斗威儀君乘金而王其政訟平芳桂常生 原天地
運度經泰山北有桂樹七十株天神青腰玉女三千人

守之其實赤如橘人食之一年仙官迎之常有九色飛鳳寶光珠雀鳴集於此 三輔黃圖甘泉宮南有昆明

池中有靈波殿以桂為柱風來自香 洞冥記有遠飛

雞夕則還依人曉則絕飛四海嘗銜桂實歸於南土

增西京雜記上林苑栒桂十株 拾遺記岱輿山北有

玉梁十丈駕玄流之上傍有丹桂紫桂白桂皆直上百

尋可為舟航謂之文桂之舟 王母與燕昭王遊於燧

林之下說炎帝鑽火之術取綠桂之膏燃以照夜忽有

飛蛾銜火狀如丹雀來拂於桂膏之上 宣帝元鳳二

年於琳池之南起桂臺以望遠氣東引太液之水有一
連理桂樹上枝跨于渠水下枝隔岸而南生與上枝同
一株 金樓子桂花不實玉卮不當 原廬山記山有

三石梁廣不盈尺俯盼杳然無底吳猛將弟子過此梁
見老翁坐桂樹下以玉杯盛甘露與猛 增平泉山居

草木記有剡溪之紅桂鍾山之月桂曲阿之山桂永嘉
之紫桂剡中之真紅桂 酉陽雜俎舊言月中有桂有

蟾蜍故異書言月桂高五百丈下有一人常斫之樹創

隨合人姓吳名剛西河人學仙有過謫令伐樹釋氏書

言須彌山南面有閻扶樹月過樹影入月中或言月中

蟾桂地影也空處水影也此語差近 國史補南中有

山洞一泉往往有桂葉流出好事者因目為流桂泉

原本草拾遺江東諸處每至四五月後嘗於衢路拾得

桂子大如狸豆破之辛香故老相傳是月中下也北方

獨無者非月路也 增南部烟花記陳主為張麗華造

桂宮於光昭殿後作圓門如月障以水晶後庭設素粉
梁恩庭中空洞無他物惟植一株桂樹樹下置藥杵白
使麗華恒馴一白兔時獨步於中謂之月宮 清異錄
韓恭叟離合巖桂二字為巖山圭木 南部新書杭州
靈隱山多桂寺僧曰月中種也至今中秋夜往往子墜
寺僧亦曾拾得招賢寺僧植桂香紫可愛郡守白公號
紫陽花 原東坡詩注天竺昔有梵僧云此山自天竺
鷲山飛來八月十五夜嘗有桂子落 羅湖野錄黃公

魯直館黃龍山從晦堂和尚遊晦堂因語次舉孔子謂弟子以我為隱乎吾無隱乎爾請公詮釋而至於再晦堂不然其說公怒形於色沈默久之時當暑退涼生秋香滿院晦堂乃曰聞木犀香乎公曰聞晦堂曰吾無隱乎爾公欣然領解 增彥周詩話先伯父熙寧九年四月二十七日夜夢至一處榜曰清香館東邊有別院東壁有詩牌云題冀公功德院山東李白其詩曰秋風吹桂子只在此山中待得春風起還應生桂叢桂叢日已

滿清香何時斷只為愛清香故號清香館伯父自作記
夢一篇書之甚詳 老學庵筆記張子韶對策有桂子
飄香之語趙明誠妻李氏嘲之曰露花倒影柳三變桂
子飄香張九成 原話腴明之象山士子史本有木犀
忽變紅色異香因接本獻闕下高廟雅愛之畫為扇面
仍製詩以賜從臣云月宮移向日宮裁引得輕紅入面
來好向烟霄承雨露丹心一點為君開又云秋入幽巖
桂影團香深粟粟照林丹應隨王母瑤池宴染得朝霞

下廣寒自是四方爭傳其本歲接數百史氏由此昌焉
一卉之微香色稍異能動至尊入品題且昌其主可以
人而不如木乎 增學齋帖 花中惟巖桂四出余謂

土之生物其數皆五故草木花皆五惟桂乃月中之木
居西方地四乃西方金之成數故花四出而金色且開
於秋云此桂之在離騷以喻君也先師魏鶴山巖桂詩
云虎頭點點開金粟犀首纍纍佩印章自注云顧虎頭
善畫金粟佛公孫衍佩五國相印真善借喻而體物矣

余亦嘗賦巖桂云四出花中異三開格外芳名高評月
品韻勝霸秋香或者頗許之以為弗可移賦他花木也
澄懷錄韓熙載云對花聞香木犀宜龍腦 三餘贅

筆曾伯端以巖桂為仙友張敏叔以桂為仙客 客座
新聞衡神祠其徑綿亘四十餘里夾道皆合抱松桂相
間連雲蔽日人行空翠中而秋來香聞十里計其數云
一萬七千株真神幻佳境 弇山園記芙蓉池之西北
度有小橋崇阜若馬脊皆植桂凡數十百樹曰金粟嶺

原學圃餘疏木犀吾地為盛天香無比然須種早黃

毬子二種不惟早黃七月中開毬子花密為勝即香亦

馥郁異常丹桂香減矣以色稍存之餘皆勿植又有一

種四季開花而結實者此真桂也閩中最多常以春中

盛開吾地亦間有之宜植以備一種花之四季開者

蘭桂而外有月桂長春菊月桂閩種為佳增閩部疏

延平多桂亦能多瘴福南四郡桂皆四季花而反盛於

冬凡桂四季者有子唐詩所云桂子月中落此真桂也

江南桂八九月盛開無子此木犀也 湧幢小品蘭溪

高子章先世封樹之地兩桂當庭取東坡何氏讀書堂
語扁曰香入雲杜端父為之賦曰緣曾分月種故發入
雲香子章曰似矣請更散語端父再屬長篇云山麓有
庭存古意不種凡花惟種桂苔封蘚剝迸鱗皴雪勁霜
頑聳蒼翠栽培豈解一日成愛惜至今尤不易來人不
必問典刑對此儼然前輩是樹前翁仲不可求樹下子
孫能幾世子孫立竹滿庭除前人於此見心事近年喬

木幾家存是中林壑何陰翳前人種樹愛讀書種時已
喻書中義後人讀書念前人對樹類能歌蔽芾八月九
月秋風高金丹變化乘飄飄朝元顧祖歸寒殿仙香直
入干雲霄老兔癡蟾開鼻孔奏徹虛皇應得寵虛皇錫
賚萬瓊瑤賞君愛護月中種 紹定間舒岳祥讀書館
中中秋月色皎然聞瓦上聲如撒電甚怪之其祖拙齋
啟門視之乃曰此月中桂子也我嘗得之天台中呼
童子就西庭中拾得二升大如豫章子無皮色白如玉

有紋如雀卵其中有仁嚼之作芝麻氣味囊之雜菊花
作枕清芬襲人其收拾不盡散落甌隙者旬輒出樹子
葉柔長經冬猶秀尋徙植盆中久之失其所在 瓶史
浴木犀宜清慧兒 木犀以芙蓉為婢 七曲山記文
昌殿後為桂香殿丹粟秋飄一色盡染彌月猶馥 原
杭州府志月桂峯在武林山宋僧遵式序云天聖辛卯
秋八月十五夜月有濃華雲無纖翳天降靈寶其繁如
雨其大如豆其圓如珠其色有白者黃者黑者殼如芡

實味辛識者曰此月中桂子好事者播種林下一種即
活張君房為錢塘令夜宿月輪山寺僧報曰桂子下
塔遽起望之紛如烟露回旋成穗散墜如牽牛子黃白
相間咀之無味花史無瑕嘗著素裳折桂明年開花
潔白如玉女伴折取簪髻號無瑕玉花

集藻騷原漢淮南小山招隱士桂樹叢生兮山之幽偃
蹇連蜷兮枝相繚山氣籠從兮石嵯峨谿谷嶄巖兮水
曾波猿狖羣嘯兮虎豹嘯攀援桂枝兮聊淹留王孫遊

兮不歸春草生兮萋萋歲暮兮不自聊蟪蛄鳴兮啾啾
塊兮軋山曲岬心淹留兮洞荒忽罔兮沕憐兮栗虎豹
岵叢薄深林兮人上慄岵岵碕礧兮碕礧碕樹輪相
紉兮林木茇飢青莎雜樹兮蘋草霍靡白鹿麋麇兮或
騰或倚狀貌崢嶸兮峩峩淒淒兮漉漉獼猴兮熊羆慕
類兮以悲攀援桂枝兮聊淹留虎豹鬬兮熊羆咆禽獸
駭兮亡其曹王孫兮歸來山中兮不可以久留

賦增唐崔琪桂林一枝賦倬彼衆木者其桂林一枝淮

南擢秀月上標奇光雨露之新沐拂香風以徐吹故能
使顥氣凌空孤陰耀質心既丹而不二花又白而純一
凝霜隕而色鮮嚴景凋而葉密若然者固將與大椿而
爭長豈徒挺小山而間出至如孫弘已落郗詵未第沮
塵色與灰心然粒玉而燼桂孰謂連卷銜半死之質特
達承再生之惠淹留君之庭芳郁君之砌惜矣哉向使
便辭仙客永棄幽林委根不用之境滅影空山之陰又
焉能擅崑玉之高價吐歲寒之宿心彼徒見零落焦梧

再斲恩深于既往殊不知摧殘朽桂一枝重遇于當今

趙蕃月中桂樹賦圓月如霜有仙桂兮宛在中央映
澄澈之素彩逗歲蕤之冷光杳杳低枝拂孤輪而挺秀
依依密樹侵滿魄而含芳觀其皓爾方凝脩然不改隨
升沉而自若貫盈缺而長在負羃羃而臨空杳萋萋而
發彩同蟾蜍之片影似濯瑤池異珊瑚之幽叢徒生滄
海埃壒初歇關山正秋空沈寥而逾淨色冉冉而彌幽
謂扇花薄如珪玷浮望玉露之初垂遙疑滴瀝聽金風

之乍起遠若颼颼皎皎孤懸亭亭相向纔分杳靄之質
微辨輪囷之狀諒攀援而莫及寧欲淹留歎音塵之未
期空勞曠望嘉其竦本無地分輝有餘轉低影於穹碧
擢幽姿于顥初訝姮娥之繪成文逾霍靡並秦鏡之照
出勢自蕭疎斯所以亘雲路委天衢弱質中植纖條外
扶亂彩時搖起飛飛之驚鵲澄波靡隔掩歷歷之高榆
是故邈彼輕霄呈茲永夕紛敷遠瑩偃蹇旁射夾餘霞
而暫丹經斜漢而彌白臨紫極而天香不散指北斗而

仙花可摘況其遠象臃腫桂子冥空惜迢遞而遐想況
嬋娟而內融素色不彫自挺霜雪之外清陰迴互頻移
霄漢之中何必詠招隱卧幽叢庶高枝兮可折願逍遙
于蟾宮 楊真弘月中桂樹賦月滿于東桂芳其中因
澄輝之皎潔見幽茂之玲瓏炫凝冷于清夜寫濃纖于
碧空遠莫致之詎攀折以盈手光可鑒也覺清明之在
躬夫擢本陰靈流形永夕稟玉燭之和氣潤金泥之滋
液枝徘徊而若垂葉霍靡以如積同作續于團扇想乎

尹于尺壁悠悠歷歷宜乎凜秋滿虛輪而挺秀瑩白暈
以含幽天邊無風孕香氣而不散草上有露泛花光而
若浮異夫高謝地靈妙融真宰籠玄鬼以不動映素娥
而如在太陽讓美妝若木之餘暉列宿懷慙掩白榆而
沉彩既寒暑無變亦古今不殊是知托其所終乃異顛
而不扶二氣初分誰見裁生之質三光不息斯無朽蠹
之虞與燃薪而殊患同瑞草之共舒事相傳于撫實勢
終類于憑虛樓上含華映網軒而列耀園中委照並嘉

木之蕭疎千里共瞻九霄之上冬春無清淨之景朐眊
闕婆娑之狀及素秋之節信謂逢時當明德之年何憂
掩望耻片玉以齊價笑三珠之可尙彼叢生因地森挺
凌霜驗植物之斯美杳神功之可量垂蔭何方乃傳天
之下界結根何處宛在月之中央又安能較其小大齊
其短長冀一枝兮可得敢驤首以觀光 宋楊萬里木
犀花賦秋氣已末秋日已夕楊子觴客客醉欲出偶雲
物之淨盡吐霽月之半壁楊子鼻觀若有觸焉澹空山

之何有驚妙香之郁然急謂客曰是必有異吾與子盍
小觀之行而求之無物可即也舍而不求又不能自息
也天風忽來其香浩蕩楊子乃凝神而從之忽欣然而
獨往蓋吾履未出於柴門之裏吾身已超於廣寒之上
矣水國湛湛不足以爲其空明而深靚也雪宮皚皚不
足以爲其高寒而迴映也玉階之前有團其陰蔚乎瑠
璃之葉械乎琴瑟之音天葩芬敷匪玉匪金細不逾粟
香滿天地蓋向者之所聞乃於茲其良是摩挲玉蟾蜍

而問焉亦不知其名而字之曰桂吾甚愛之欲求其裔
將刈其枝以修身之玉斧淪其根於銀河之秋水移之
以歸藝我庭砌羿妃潁然而不悅曰余將白之於帝楊
子聳然而寤月尚未午客亦未去顧而見木犀之始花
宛其若天上之所覩笑而問客曰吾之茲遊夢邪醉邪
惘然不知其處

文賦散句原楚屈原九歌美要眇兮宜修沛吾乘兮桂
舟桂擢兮蘭枻桂棟兮蘭橈結桂枝兮延佇羗

愈思兮愁人 援北斗兮酌桂漿 辛夷車兮結桂旗

遠遊嘉南州之炎德兮麗桂樹之冬榮 大招菝蘭

桂樹鬱彌路只 東方朔七諫登巒山而遠望兮好桂

樹之冬榮 飲筍若之朝露構桂木而為室 增王褒

九懷步驟桂林兮超驤卷阿 劉向九歎結桂樹之旖

旒兮紉荃蕙與辛夷 原王逸九思桂樹列兮紛敷吐

紫華兮布條 增左思吳都賦丹桂灌叢

五言古詩增梁庾肩吾詠桂新叢入望苑舊幹別層城

請視今移處何如月裏生 周王褒詠永定寺桂樹歲

餘凋晚葉年至長新圓月輪三五映烏生八九飛 原

唐王績春桂問答二首問春桂桃李正芳華年光隨處

滿何事獨無花 春桂答春花詎能久風霜搖落時獨

秀君知否 增王績古意桂樹何蒼蒼秋光花更芳自

言歲寒性不知露與霜幽人重其德徙植臨前堂連拳

八九樹偃蹇二三行枝枝自相糾葉葉還相當去來雙

鴻鵠棲息兩鴛鴦榮蔭誠不厚斧斤亦勿傷赤心許君

時此意那可忘

原李白詠桂世人種桃李皆在金張

門攀折爭捷徑及此春風暄一朝天霜下榮耀難久存
安知南山桂綠葉垂芳根清陰亦可託何惜植君園

增柳宗元自衡陽移桂十餘本植零陵所住精舍謫官
去南裔清湘繞靈岳晨登蒹葭岸霜景霽紛濁離披得
幽桂芳木欣盈握火耕困烟燼薪採久摧剥道傍且不
顧岑嶺况悠邈傾筐擁故壤棲息期驚鷺路遠清涼宮
一雨悟無學南人始珍重微我誰先覺芳意不可傳丹

心徒自渥 李德裕紅桂樹昔聞紅桂樹獨秀龍門側

越叟移數株周人未嘗識平生愛此樹攀翫無由得君
子知我心因之為羽翼豈煩嘉客譽且就清陰息來自
天姥岑長疑翠嵐色芳芬世所絕偃蹇枝漸直瓊葉潤
不凋珠英粲如織猶疑翡翠宿想待鷓鴣食寧止暫淹
留終當更封殖 白居易有木詩有木名丹桂四時香
馥馥花團夜雪明葉翦春雲綠風影清似水霜枝冷如
玉獨占小山幽不容凡鳥宿匠人愛芳直裁截為厦屋

幹細力未成用之君自速重任雖大過直心終不曲縱
非梁棟材猶勝尋常木 廬山桂偃蹇月中桂結根依

青天風繞月起吹子下人間飄零委何處乃落匡廬
山生為石上桂葉如翦碧鮮枝幹日長大根荦日牢堅
不歸天上月空老山中年廬山去咸陽道里三四千無
人為移植得入上林園不及紅花樹長栽溫室前 皮
日休詠公齋小桂一子落天上生此青壁枝歛從山之
幽斲斲雲根移勁挺隱珪質盤珊緹油姿葉彩碧髓融

花狀白毫蕤稜層立翠節偃蹇樛青螭影澹雪霽後香
汎風和時吾祖在月竈孤貞能見怡願老君子地不敢
辭喧卑 陸龜蒙和襲美詠公齋小桂諷賦輕八植擅
名方一枝才高不滿意更自寒山移宛宛別雲態蒼蒼
出塵姿烟歸助華杪雪點迎芳蕤青條坐可結白日如
奔螭諒無剗翦憂即是蕭森時洛浦雖有蔭騷人聊自
怡終為濟川楫豈在論高卑 宋梅堯臣和韓子華桂
花莫以天下桂皆為月中物猶言月有兔野豈無狡窟

空山桂花多艷色粲然發樵客不知貴奈何薪爨屈

臨軒桂山楹無惡木但有綠桂叢幽芳尚未歇飛鳥銜
殘紅不見離騷人憔悴吟秋風 奉和永叔得辛判官

伊陽所寄山桂數本封殖之後遂成雅韻以見貺團團
綠桂叢本自幽巖得惠好知不忘青葱寧改色香生蓮
幕間花白萱堂側月露夜偏滋瓊枝相翕赭 原歐陽
修謝人寄雙桂樹子有客賞芳叢移根在幽谷為懷山
中趣愛此巖下綠曉露秋暉浮清陰藥闌曲更待繁華

白邀君弄芳馥

曾肇詠桂團團桂叢孤枝葉寒更媚

託根庭宇間自有幽人致何必問嫦娥青雲借餘地

劉子翬木犀古風化工各幽香斑斑被花木氤氲寒巖

桂高韻蓋羣馥無人盡日芳守志何幽獨士介恥求知

女貞慚自鬻淒涼楚山秋繆枝吐金粟淺水映輕明微

風發含蓄樓端靜忽聞馬上遙相逐踟躕為延佇但見

林巒綠鉼罌誰折贈清芬悶廬屋久處不自知乍至彌

鬱郁客悲芳歲暮夢遶寒溪曲長吟小山詞古意恐難

復增朱松月桂花窓前小桂叢著花無曠月月行晦
朔周一再開復歇初如醉肌紅忽作絳裙色誰人相料
理耿耿自開落有如貧家女信美乏風格春風木芍藥
穠艷傾一國芳根雖無恙歲晚但枯朽 陸游寄題廬

陵王晉輔先輩桂堂楚人記草木桂在椒蘭中我懷小
山句妙絕窮化工唐人作山水亦以桂配松丹葩間綠
葉錦繡相疊重不知始何時巖桂開秋風楚人所稱者
委棄等蒿蓬嗚呼各有時士豈怨不逢我作桂堂詩廣

子雲夢胸 張孝祥桂花天心不重金富媼不復藏居

然土同價散作草木芳英英園中葵一心傾太陽采采
籬下菊令汝壽命康惟此木中犀更貯萬斛香雄姿傲
霜雪鱗甲森青蒼三賢鼎足立正色凜相望豈比桃李
徒紅紫紛披昌聊息貪者心未上君子堂歲晚從我游
寘汝兄弟行 金酈權木犀菊小未堪摘荒池悴芙蕖
窮秋不慰眼幽獨將焉如殷勤蕊宮子種桂庭之除乘
閒弄餘花散落荒山隅從茲雲月裔漂泊生江湖娟娟

耐凍枝便與羣芳殊琉璃翦芳葆蛾黃拂仙裾唾袖花
點碧漱金粟生膚好風一披拂九里香縈紆蘭蕙不敢
友荃蓀正僮奴妄意此尤物化工異吹噓不然九天香
安得獨付渠託物寄深縕古今一三閭收攬名草木自
比君子徒惟茲不挂口無乃聖不居抑夫古簡編斷絕
秦火餘君看齊魯臣史筆逸其書惜哉不可曉臨風為
嗟吁尤憐元祐前不及附歐蘇末路益可惜例進宣和
初仙根豈易致百死不一甦昔游汴離宮識此傾城姝

摩挲三品石尚想狎客娛却後十五年微霜半黏鬚一枝再經眼相對憐羈孤不知苦何事玉骨乃爾癯故人憐我老尺書遠招呼要趁秋香濃共此碧玉壺遙知嬋娟客與我一笑俱 明陳憲章和陶飲酒木犀冷於菊更後十日開清風吹芳香芳香襲人懷千回嚙入腹五內無一乖雖靡鸞鳳吟亦有鷦鷯棲昔者東籬飲百榼醉如泥那知此日花復與此酒諧一曲盡一杯酩酊花間迷赤脚步明月酒盡吾當回 王寵飲錢二孔周宅

桂花下嘉樹蔭團團露華白本自招搖山植君青
霞宅不意凌寒姿占此瑤墀隙高枝挂珠網卑條敷綺
席萋萋布葉陰茸茸吐花積風飄遠近香月映盈虧魄
既集佳麗人亦招隱淪客幸承金樽薦親勞玉腕摘歌
曲出玲瓏舞袖隨寬窄條繁每冒釵花落常點額戲羽
必成雙棲禽無單隻及此芳菲時荷君千金惜不醉且
淹留看朱已成碧

七言古詩增唐陳陶殿前生桂樹仙娥玉宮秋夜明桂

枝拂檻參差瓊香風下天漏丁丁牛渚翠梁橫淺清羽
帳不眠恨吹笙樓鳥暗驚仙子落步月髣雲墮金雀蕙
樓涼簾翠波空銀縷香寒鳳凰薄東海即為郎斟酌綺
疏長懸七星杓 原宋毛滂桂花歌玉階桂影秋綽約
天空為捲浮雲幕嬋娟醉眠水晶殿老蟾不守餘花落
蒼苔忽生霜月裔仙芬淒冷真珠萼娟娟石畔為誰妍
香霧著人清入膜夜深醉月寒相就荼蘼却作傷心瘦
弄雲仙女淡紵衣烟裙不著鴛鴦繡眼中寒香誰同惜

冷吟徑召梅花魄小蠻為洗玻璃杯晚來秋甕蒲桃碧

增謝翱後桂花引修月仙人飯玉屑瑤鴨騰騰何處

熱吳剛生愁樹合創毫飄玉斧高枝折此時待罪扣帝

庭素娥騎蟾涕淚零月中落子如雨星至今收拾無六

丁元顧瑛玉山亭館分題得金粟影飛軒下瞰芙蓉

渚檻外幽花月中吐天風寂寂吹古香清露泠泠濕秋

圃雲梯萬丈手可攀居然夢落清虛府庭中擣藥玉兔

愁樹下乘鸞素娥舞瓊樓玉殿千娉婷中有癯仙淡睂

宇問我西湖舊風月何似東華軟塵土寒光倒落影娥
池的皦明珠承翠羽但見山河影動搖獨有清輝照今
古覺來作詩思茫然金粟霏霏下如雨 明楊基宜秋
軒桂宜秋軒東一株桂香葉婆娑擁寒翠秋堂夜靜風
滿簾時覺幽芳來拂鼻清晨曳履訪幽獨一徑青苔雙
戶閉離離嫩蕊罨蟲絲蔌蔌輕花落深砌麝金泣露濃
更密苞粟凝珠疎復細半粒能含萬斛香一枝解奪千
姝媚當年此地競攀折月戶雲窓敞秋霽金尊灑泛綠

色酒翠袖涼簪寶妝髻西風幾度人跡絕獨有幽花能
點綴村荒地僻霜露繁摧折紅蘭凋紫蕙瞥然一見衆
憂失不意孤懷得佳麗更深月出擬再來明日紛紛嗟
滿簞 陳憲章擬移木犀於上游黃雲示民澤木犀金
粟散天香在秋之季廬山陽湛生期我上游莊移根千
丈黃雲岡萬丈黃雲千丈山金粟花開不等閒金粟氤
氲塞兩間吁嗟乎金粟丈人與爾同歲闌

五言律詩原唐李嶠詠桂花未植蟾宮裏寧移玉殿幽

枝生無限月花滿自然秋
俠客條為馬仙人葉作舟
願君期道術攀折可淹留
增李德裕紅桂樹欲求塵外

物此樹是瑤林後素含餘絢如丹
見本心妍姿無點辱
芳意托幽深願以鮮葩色
凌霜照碧潯月桂何年霜

夜月桂子落寒山翠幹生巖下
金英在世間幽崖空自
老清漢未知還惟有涼秋夜
嫦娥來暫攀山桂吾愛

山中樹繁英滿目鮮臨風飄碎錦
映日亂飛烟影入春
潭底香凝月榭前
豈知幽獨客賴此當朱絃
于武陵

山中桂日暖上山路鳥啼知己春忽逢幽隱樹如見獨
醒人石冷開常晚風多落亦頻樵夫應不識歲久伐為
薪 宋曾幾巖桂粟玉黏枝細青雲翦葉齊團團巖下
桂表表木中犀江樹風蕭瑟園花氣慘淒濃薰不如此
何以慰幽棲 劉子翬巖桂涼飈振遠村寂寞度清芬
山路不知處月窓時夜聞孤根寒抱石落子半飄雲袖
手空延佇無才可賦君 原朱子巖桂山中綠玉樹瀟
灑向秋深小閣芬微度書帷氣欲侵披懷清露曉遇賞

夕嵐陰珍重王孫意天涯淚滿襟
亭亭巖下桂歲晚

獨芬芳葉密千層綠花開萬點黃
天香生淨想雲影護仙妝誰識王
孫意空吟招隱章
增朱子詠巖桂露浥

黃金蕊風生碧玉枝千株向搖落
此樹獨華滋木末難

同調籬邊不並時攀援香滿袖歎
息共心期
原方九

功巖桂西墅絕喧囂秋梧葉亂飄
獨憐青桂樹金粟綴

柔條泛酒香偏細入詩景更饒小
山風可仰招隱此道

遙
增元倪瓚桂花桂花留晚色簾影
淡秋光靡靡風

還落菲菲夜未央玉繩低缺月金鴨罷焚香忽起故園
想冷然歸夢長 原明申時行詠適園桂林巖壑同

棲處風霜獨秀時暗飄靈隱粟高擢廣寒枝露氣侵衣
袂天香撲酒卮桂叢吾自密不負小山期 郭鯤漢詠

桂西嶺千年桂陰森入翠微瓊枝雲外綠金粟雨中肥
影落浮杯酒香飄襲客衣當年和露折曾向廣寒歸

七言律詩增唐劉禹錫酬令狐相公使宅別齋初栽桂
樹見懷之作清淮南岸家山樹黑水東邊第一栽影近

畫梁迎曉日香隨綠酒入金杯根留本土依江潤葉起
寒稜映月開早晚陰成比梧竹九霄還放綵籬來原

宋蘇軾八月十七日天竺山送桂花分贈元素月缺霜
濃細蕊乾此花原屬桂堂仙鷺峯子落驚前夜蟾窟枝
空記昔年破裊山僧憐耿介練裙溪女鬪清妍願公採
擷紉幽佩莫遣孤芳老澗邊增羅從彥和延年巖桂

幾樹芬芳氣欲沉枝枝若占鄰家林風搖已認飄殘菊
日照渾疑綴散金仙窟移來成美景東堂分去結清陰

我今不願蟾宮折待到秋宵把酒吟 范成大次韻王

浚明詠新居木犀月窟移來有貴名一簾金碧照東榮

鼻端入妙睡魔醒眼底會真詩句生日氣瓏璁無奈醉

露華凌亂不勝清君家傾國何時見淡掃蛾眉撚夕英

陸游嘉陽絕無木犀偶得一枝戲作久客紅塵不自

憐眼明初見廣寒仙只饒籬菊同時出尚占紅梅一著

先重露濕香幽徑曉斜陽烘蕊小窓妍何人更與蒸沉

水金鴨華燈惱醉眠 原楊萬里巖桂塵世何曾識桂

林花仙夜入廣寒深移將天上衆香國寄在梢頭一粟
金露下風高月當戶夢回酒醒客聞砧詩情惱得渾無
那不為龍涎與水沉 增楊萬里栽桂分得吳剛斫處
林鵝兒酒色不須深系從犀首名干木派列黃香字子
金衣濺薔薇兼水麝韻和月杵應霜砧餘芬熏入旃檀
骨從此人間有桂沉 昨日訪子上不遇裴回庭砌觀
木犀而歸再以七言乞數枝昨攜兒輩叩雲關繞遍巖
花恣意看苔砌落深金布地水沉蒸透粟堆盤寄詩北

院賒秋色供我西窓當晚餐小朶出叢須折却莫教衝

破碧團圓 呂聲之桂花獨占三秋壓衆芳何誇橘綠

與橙黃自從分下月中種果若飄來天際香清影不嫌

秋露白新叢偏帶晚烟蒼高枝已斷却生手萬斛奇芬

貯錦囊 徐集孫重重簾幙護金猊小樹花開逼麝臍

寒色十分新軫粟春心一點暗通犀香延棋畔仙人斧

影駐燈前太乙藜從此再周花甲子伴公長醉玉堂西

原楊濟翁翠圍侍女擁紅幢霞臉調朱笑額黃共醉

東君千日酒更翻西母九霞觴人間天上高低影月下
風前自在香輸與廣寒宮裏客年年綠鬢賞秋光 增
金玉萬鍾元氏桂軒為敏之賦簾捲堂前桂子涼一軒
燈火夜初長月中春好元無價天上風來別有香棠棣
一家同映秀詞林百世繼餘芳閒花野草空無數掩盡
人間獨擅場 元方變木犀二首下土花中第一流移
根自笑此生浮獨依上界清虛府滿貯青冥沆瀣秋稜
葉風翻低散亂蒼皮蟲蝕老雕鏤醉來逕向高寒處自

駕青鸞擁玉蚪 蒼蒼珠樹俯寒流
析木津頭戲拍浮

褐鳳搏風朝紫極 硯蟾滴露瀉清秋
返魂香倩羅裳貯 礙月枝憑玉斧鏤
夜景未闌清入骨 瀟瀟鱗甲臥癡蚪

木犀花曾住仙山 九折巖夜涼
蘿荔挂衣衫 月窺尊裏如相伴
人立花邊自不凡 叢綠聯環瑤玉佩
殘黃瑣骨現金函 枝空蟾窟今誰記
猶道東陵繫舊銜 李孝

光冬日見桂花北風吹倒碧琅玕
金粟棲枝露未乾 翠氣遙連仙掌曉
天香微墮玉壺寒 明蟾照影臨丹闕
青

女銷香著畫欄可是天翁露消息小春先得一枝看
原明申時行秋夜飲桂花下招隱曾緣桂樹留追歡仍
愛小山幽尊前露氣浮青漢雲裏天香散碧秋老幹已
分蟾窟種良宵堪續兔園遊靈樁晚歲能相傍花底何
妨醉白頭 增吳孔嘉月下看桂西風吹綻一林黃玉
露漙漙金粟香蟾冷不分天上影兔肥應戀月中光飄
來少女明河淨掇去仙郎秋苑長坐久衣裾清夜濕小
山疑種廣寒傍

五言排律增唐張喬華州試月中桂與月轉鴻濛扶疎
萬古同根非生下土葉不墮秋風每以圓時足還疑缺
處空影高羣木外香滿一輪中未種丹霄日應虛玉兔
宮何當因羽化細得問玄功顧封人月中桂芬馥天
邊桂扶疎在月中能齊大椿長不與小山同皎皎舒華
色亭亭麗碧空虧盈寧委露搖落不關風歲晚花應發
春餘質詎豐無因遂攀折常欲望青蔥羅隱秋風生
桂枝涼吹從何起中宵景象清漫隨雲葉動高傍桂枝

生漠漠看無際蕭蕭別有聲遠吹斜漢轉低拂白榆輕
寥泬工夫大乾坤歲序更因悲未歸客長望一枝榮
明陳憲章月桂自白石移來金粟初分我花仙不吝人
烟霞三畝宅草木百年身影入青霄舊香傳白石新為
誰工態度本自惜精神翠竹旁通徑緋桃正隔津生憂
兒女狎莫摘老夫嗔坐久風回席行遲露在中當時尊
玉茗平地隱冰輪收斂還真性生成荷大鈞相逢山水
地一笑武陵春

五言絕句原唐盧僎題殿前桂樹桂樹生南海芳香隔
楚山今朝天上見疑是月中攀 增宋朱子木犀喬木
生夏涼芳蕤散秋馥未覺歲時寒扶疎方遶屋 原楊
萬里巖桂不是人間種移從月裏來廣寒香一點吹得
滿山開 增明李東陽月桂一月一花開花開應時節
未須誇雨露慎與藏冰雪 陳淳題桂花金粟花開日
天香散玉墀嫦娥解人意折贈最高枝

七言絕句增唐白居易東城桂二首子墮本從天竺寺

根盤今在闔閭城當時應逐南風落
落向人間取次生
遙知天上桂花孤試問嫦娥更要無月宮
幸有閒田地何不中央種兩株
廳前桂天台嶺上凌霜樹司馬
廳前委地叢一種不生明月裏山中猶
校勝塵中方
千題黃山人庭前孤桂映窓孤桂非手
植子落月明聞
落時仙客此時頭不白
看來看去有枯枝
皮日休天竺寺八月十五日夜桂子
玉顆珊珊下月輪
殿前拾得露華新
至今不會天中事
應是嫦娥擲與人
曹鄴寄

陽朔友人桂林雖產千株桂未解當天影日開我到月

中收得種為君移向故園栽 陳陶雙桂詠青冥結根

易傾倒沃州山中雙樹好琉璃宮殿無斧聲石上蕭蕭

伴僧老 宋謝逸咏巖桂輕薄西風未辦霜夜揉黃雪

作秋光摧殘六出猶餘四正是天花更著香 原韓駒

木犀淪雪凝酥點嫩黃薔薇清露染衣裳西風掃盡狂

蜂蝶獨伴天邊桂子香 增陳與義微雨中賞月桂獨

酌人間跌宕簡齋老天下風流月桂花一壺不覺叢邊

盡暮雨霏霏欲濕鴉

鄭仲熊天公憐我太岑寂每歲

慙懃兩度開收拾落英將底用博山香裏薦清杯

范

成大次韻馬少伊木犀月窟飛來露已涼斷無塵格染

蜂黃纖纖綠裏排金粟何處能容九里香 水尾山腰

樹影蒼一天風露不供香誰家鏡裏能消得付與詩人

古錦囊 密密嬌黃侍翠輿避風遮日小扶疎畫闌想

見懸秋晚無限宮香總不如 探木犀秋半秋香花信

遲攀枝擘葉看纖微昨朝尚作茶槍瘦今雨催成粟粒

肥 真瑞堂前丹桂血色凡花太俗生花工新意染秋

英袍紅太重鞋紅淺畫不能摹句寫成 官忙風月鎮

長閒開遍香紅酒尚寒若要與花相領畧千巖隨分有

闌干 壽櫟堂前假山成移丹桂于馬城自嘲堂前趣

就小嶙峋未許蹣跚杖履親更遣移花三百里世間真

有大癡人 巖桂二首越城芳徑手親栽紅淺黃深次

第開不用小山招隱賦身如強健日千迴 一株蕭索

倚宣華東苑香風屬內家丹碧屠蘇銀燭照平生奇絕

象山花

中秋後二日自上沙回聞千巖觀下巖桂盛

開復樣石湖留賞一日賦兩絕金粟枝頭一夜開故應

全得小詩催籃輿緩緩隨兒女引入天香洞裏來 千

巖觀下碧瑤林歲晚青青共此心隱士歸兮花未老每

年來把一杯深 楊萬里凝露堂木犀雪花四出翦鵝

黃金粟千楚糝露囊看去看來能幾大如何著得許多

香 夢騎白鳳上青空徑度銀河入月宮身在廣寒香

世界覺來簾外木犀風 原朱子次劉彥集木犀韻衆

芳搖落九秋期橫出天香第一枝莫似寒梅太孤絕更
教遙夜笛中吹 仙衣纔試鬱金黃便覺秋風滿院芳
定觀極知先透徹通心豈是故迎將 秋到寒巖桂樹
叢小山吟罷思悲翁不妨更作淹留計占取人間十里
風 王十朋學仙深愧似吳郎賴有吾廬兩字蒼疑是
廣寒宮裏種一秋三度送天香 丹霄休歎路難通學
取燕山種桂叢異日天香滿庭院吾廬當似廣寒宮
方岳木犀誰遣秋風開此花天香來自玉皇家鬱金裳

浥薔薇露知是仙人萼綠華
鄧志宏雨過西風作晚

涼連雲老翠入新黃清風一日來天闕世上龍涎不敢
香 增何菊潭露洗金蟲一半開層層碧玉映樓臺西
風昨夜吹香過人在欄干待月來 原朱貫之多應仙

國山邊種豈是姮娥月裏香願為兒孫積陰德東堂常
占一時芳 增朱貫之人間植物月中根碧樹分敷散

寶薰自是莊嚴等金粟不將妖艷比紅裙 徐介軒翠

葉金花小膽瓶輕拈款顛不勝情從教失陷沉烟裏薦

地薰心夢也清 原朱淑真桂花彈壓西風擅衆芳十

分秋色為伊忙一枝淡貯書窓下人與花心各自香

月待圓時花正好花將殘後月還虧須知天上人間物

同稟清秋在一時 增元張雨桂枝詞桂樹叢生枝婀娜

娜糝粟黃雲欲成朶薰醒秋衣嬾下床金蟾嚙斷燒香

鎖 明史謹直房間桂香松陰池館晝偏涼何處飄來

桂子香起傍雕欄看秋色廣寒宮殿近昭陽 沈周桂

花高攀才子沾衣綠爭插佳人壓鬢黃誰向蟾宮分得

種年來八月滿庭芳 丹桂迎風蓓蕾開摘來斜插竟
相偎清香不與羣芳並仙種原從月裏來 文嘉木犀
黃金宮闕鬱嵯峨萬斛清芬散綺羅吳下高枝原有種
天香莫怪屬君多 原張新金風飄處識天香清影分
明載魄光莫向高枝輕易折須知紅是狀元郎

詩散句增魏曹植桂之樹桂之樹桂生一何麗佳揚朱
華而翠葉流芳布天涯上有棲鸞下有盤螭 晉謝靈
運南州實炎德桂樹凌寒山 唐崔翹獨有幽庭桂年

年空自芳 姚崇桂含秋樹晚波入夜池寒 原李白

相思在何處桂樹青雲端 有喜留攀桂無勞問轉蓬

不采桂樹枝反棲惡木根 增李白桂枝日已綠拂

雪披雲端 每年海樹霜桂子落秋月 原杜甫天開

金粟藏人立廣寒宮 斫却月中桂清光應更多 轉

蓬行地遠攀桂仰天高 故園松桂發萬里共清輝

增王維山中有桂花莫待花如霰 原王建桂熟常收

子蘭生不作畦 增李德裕何年霜夜月桂子落寒山

杜牧手把一枝物桂花香帶雪 許渾桂樹綠層層

風微烟露凝 宋朱子幽人起晤歎桂香發窓間 林

高隱近方簷蔔黃遠比茉莉小 元何中西風一夜雨

丹桂滿林花 唐李賀畫欄桂樹懸秋香三十六宮土

花碧 李商隱昨夜西池涼露滿桂花吹斷月中香

月中桂樹高多少試問西河斫樹人 宋秦觀魚鱗甃

空排嫩碧桂露梢寒掛團壁 原張舜民天將秋氣蒸

寒馥月借金波滴小黃 增孫覲碧玉旋螺揷暮烟遙

看桂子落僧前 原韓駒月中有客曾分種世上無花

敢鬪香 增陸游賣花醉叟剥紅桂種藥高僧寄玉芝

原楊萬里憶曾風露飄寒粟自領兒童拾薄金 增

楊萬里夾路兩行森翠蓋西風半夜散麝金 天開金

粟如來藏人立廣寒宮殿秋 釋道潛長抱秋蟾滋夜

氣偶搖風露墜階除 原晉嵇康仙籍桂香浮 微風

動桂華 增謝靈運桂枝徒攀翻 梁簡文帝北榮下

飛桂 浦桂半新栽 原沈約秋風生桂枝 增周庾

信桂白小山秋 星橋視桂花 唐玄宗小山秋桂馥

王勃桂馥清溪裏 趙冬曦秋風赭桂竦 李嶠桂

香浮半月 張九齡桂花秋皎潔 原李白青桂隱遙

月 增李白幽桂有芳根 原杜甫吾將守桂叢 賞

月延秋桂 增杜甫丹桂風霜急 柳宗元露密前山

桂 孟郊古香清桂岑 白居易桂露光參差 姚合

秋風長桂聲 許渾圓桂露冥冥 于鵠桂花濕溟溟

韋莊桂和秋露滴 宋楊億霜華襲桂叢 原唐李

白巖霜五月摧桂枝 增王渙桂花曾對月嬋娟 白

居易山寺月中尋桂子 秋月晚生丹桂實 皮日休

桂寒自落翻經案 原李賀聯翩桂花墜秋月 增許

渾露墮桂花棋局濕 原李商隱兔寒蟾涼桂香白

增曹唐露風清宴桂花疎 桂樹三天雲漠漠 唐

球桂冷香聞十里間 羅隱巖畔早涼生紫桂 韋莊

仙桂年年折又生 宋錢惟演月露暗從孤桂滴 原

蘇軾江雲漠漠桂花濕 增蘇軾林深野桂寒無子

原陳與義清露香浮黃玉枝 增戴復古桂子吹香風
露深 朱子桂樹無端一夜秋 金元好問畫欄桂樹
雨聲寒 桂樹秋香月三五 元鄭元祐桂花霏雪綠
鸞翔 素桷桂花浮魄滿香輪 倪瓚垂露成帷桂花
發

詞增宋向子諲生查子我愛木中犀不是凡花數清似
水沉香色染薔薇露 鄉林月冷時玉筍雲深處歸夢
托西風夜夜江頭路 毛珣浣溪沙綠玉枝頭一粟黃

碧紗帳裏夢魂香
曉風和月步新涼
吟倚畫欄懷李

賀笑持玉斧恨吳剛
素娥不嫁為誰妝
原趙彥端憶

秦娥香靨靨小
山叢桂烘溫玉
烘溫玉酒愁花暗沈腰

如東 煩君剩與陽春曲
為君細拂羅衾馥羅衾馥一

春幽夢與君相續
增趙希彭霜天曉角
姮娥戲劇手

種長生粒寶幹婆娑
千古飄芳吹滿虛碧
韻色檀露

滴人間秋第一
金粟如來境界誰移在小亭側
謝懋

霜天曉角
綠雲翦葉低護黃金屑
占斷花中聲譽香共

韻兩清潔 勝絕君聽說是他來處別試看金衣猶帶
金庭露玉階月 原劉敞清平樂小山叢桂最有留人
意拂葉攀花無限思雨濕濃香滿袂 別來過了秋光
翠簾昨夜新霜多少月宮顏色嫦娥與借微芳 增蘇
庠清平樂斷崖流水香度青林底元配騷人蘭與芷不
數春風桃李 淮南叢桂小山詩翁合得攀翻身到十
洲三島心遊萬壑千巖 原陳與義清平樂黃衫相倚
翠葆層層底八月江南風日美弄影山腰水尾 楚人

未識孤妍離騷遺恨千年無住庵中新事一枝喚起幽

禪 增朱敦儒清平樂人間花少菊小芙蓉老冷淡仙

人偏得道買住西風一笑 前身應是紅梅黃如點破

冰肌只道暗香猶在參橫清似南枝 原辛棄疾清平

樂少年痛飲憶向吳江醒明月團圓高樹影十里薔薇

水冷 大都一點宮黃人間直恁芬芳怕是秋天風露

染教世界都香 又月明秋曉翠蓋團團好翦碎黃金

教恁小都著葉兒遮了 折來好似年時小窓能有高

低無頓許多香處只消三兩枝兒 朱淑真菩薩蠻也

無梅柳新標格也無桃李妖嬈色一味惱人香羣花爭

敢當 情知天上種飄落深巖洞不管月宮寒將枝比

並看 增趙與仁柳梢青露冷仙梯霓裳散舞記曲人

歸月度層霄雨連深夜誰管花飛 金鋪滿地苔衣似

一片斜陽未移生怕清香又隨涼信吹過東籬 原李

易安鷓鴣天暗淡輕黃體性柔情疎迹遠只香留何須

淺碧深紅色自是花中第一流 梅定妬菊應羞詩書

閒處冠中秋騷人可煞無情思何事當年不見收 向

子諵蝶戀花巖桂秋風南埭路牆外行人十里香隨步

此是鄉林遊戲處誰知不向塵根住 今日對花非浪

語憶昨明光早荷君王顧生怕青蠅輕點汚思鱸何似

思花去 張掄臨江仙玉宇涼生清禁曉丹葩色照晴

空珊瑚敲碎小玲瓏人間無此種來自廣寒宮 雕玉

欄干深院靜嫣然凝笑西風曲屏須占一枝紅且圖欹

醉枕香到夢魂中 增鄭域驀山溪嫣然一笑風味人

間沒來自廣寒宮直偷得天香入骨軟金縷眉點綴碧
瓊枝花藏葉葉籠花剛被風吹拂道人衾帳不用沉
烟熨插滿枕屏山覺身在藍橋仙窟一觴一詠消得九
秋愁籬邊菊畹中蘭甘避芳塵不吳文英古香慢怨
蛾墜柳離佩搖蒨霜訊南浦謾掩橋扉倚竹袖寒日暮
還問月中游夢飛過金風翠羽把殘雲剩木萬頃暗薰
冷麝淒苦漸浩渺凌山高處秋澹無光殘照誰主露
粟侵肌夜約羽林輕誤翦碎惜秋心更腸斷珠塵蘚路

怕重陽又催近滿城風雨 原向子諠滿庭芳月窟盤

根雲巖分種絕知不是塵凡琉璃翦葉金粟綴花繁黃

菊周旋避舍友蘭蕙羞殺山礬清香遠秋風十里鼻觀

已先參 酒闌聽我語平生半世江北江南經行處無

窮綠水青山常被此花相惱思共老結屋中間不知爾

鄉林底事遊戲到人寰 增劉子翬滿庭芳秋入微陰

涼生平遠小山愁絕天南似聞還斷飛策徧千巖葉底

輕黃纂纂惱人是微裂方絨倏然勝清真冷淡無艷寄

塵凡 澄潭欹兩岸波光搖動碧影相參任西風十里
吹度松杉我自寒灰槁木凝神處不覺醺酣歸來晚飛
花無迹明月滿空涵 元顧瑛水調歌頭金粟綴仙樹
玉露浣人愁誰道買花載酒不似少年遊最是宮黃一
點散下天香萬斛來自廣寒秋蝴蝶逐人去雙立鳳釵
頭 向樽前風滿袖月盈鉤縹緲羽衣天上遺響遏雲
流二十五聲秋點三十六宮夜月橫笛按伊州同躡彩
鸞背飛過小紅樓 宋僧仲殊金菊對芙蓉花則一名

種分三色嫩紅妖白嬌黃正
清秋佳景雨霽風涼郊墟
十里飄蘭麝瀟灑處旖旎
非常自然風韻開時不惹蝶
亂蜂狂 攜酒獨挹蟾光問
花神何屬離光中央引騷
人乘興廣賦詩章許多才子
爭攀折嫦娥道三種清香
狀元紅是黃為榜眼白探花郎
原陳亮桂枝香天高
氣肅正月色分明秋容新沐
桂子初收三十六宮都足
不辭散落人間去怕羣花自
嫌嫌俗向他秋晚喚回春
意幾曾幽獨 是天上餘香
騰馥怪一樹香風十里相

續坐對花傍但見色浮金粟芙蓉只解添愁思况東籬
淒涼黃菊入時太淺背時太遠愛尋高躅增晁補之
水龍吟智瓊嬌額塗黃為誰種作秋風蕊寒香半露綠
幃深護猶聞十里山麝生臍水沉削蠟一時羞避向錢
塘江上中秋月下有人暗尋遺子不奈書生習氣對
羣花領畧風味騷人已去欲紉幽佩重為湘耐天賦風
流友梅兄蕙輿桃奴李向明窓棐几纖枝未老眼明如
水

別錄原晉書郤詵傳詵遷雍州刺史武帝於東堂會送

問詵曰卿自以為何如詵對曰臣舉賢良對策為天下

第一猶桂林之一枝崑山之片玉帝笑 增世說客有

問陳季方足下家君太丘有何功德而荷天下重名季

方曰吾家君譬如桂樹生泰山之阿上有萬仞之高下

有不測之深上為甘露所霑下為淵泉所潤當斯之時

桂樹焉知泰山之高淵泉之深不知有功德與無也

原翰林雜事鈔武帝謂東方朔孔頴之道德何勝方朔

曰顏淵如桂馨一山孔子如春風至則萬物生 詩話
竇禹鈞有五子俱登科馮道贈之詩曰靈椿一株老丹
桂五枝芳 增率真筆記開關贈俞本明以青華酒杯
酌酒輒有異香在內或有桂花或梅或蘭視之宛然取
之若影酒乾亦不見矣俞寶之 原石桂英似桂樹而
實石生巖穴中 製用談苑桂漿殆今之桂花釀酒法
魏有頻斯國人來朝壺中有漿如脂乃桂漿也飲之壽
千歲 便民圖纂花開時擇枝繁處帶花刪下連葉陰

乾收貯來年伏中將葉泡湯服溫腹去暑 桂花點茶

香生一室菊英次之入茶為清供之最有甘菊種更宜

茶二花相為先後可備四時之用 增清供錄天香湯

白木犀盛開時清晨帶露用杖打下花以布被盛之揀

去蒂萼頓在淨磁器內候聚積多然後用新砂盆搗爛

如泥木犀一斤炒鹽四兩炙粉草二兩拌勻置磁瓶中

密封曝七日每用沸湯點服一名山桂湯一名木犀湯

原移種花時移栽高阜半日半陰處臘雪高擁於根

則來年不灌自發忌人糞宜猪糞冬月以潬猪湯澆一
次妙又麻糝久浸候水清澆亦佳蠶沙壅根澆以清水
來年愈盛北方地寒九月十月間將樹以土培根高尺
許外苫蓋周密嚴塗以泥半腰向南留一小牖暖日開
之以透太陽之氣寒則塞之春分後去其塞清明後去
其苫無有不活 插接種樹書接宜冬青又春月攀枝
著地土壓之五月生根逾年截斷含蕊移栽木犀接石
榴花必紅 防患物類相感志木犀蛀者用芝蔴梗帶

穀束懸樹上

御定佩文齋廣羣芳譜卷四十

謹案第十六頁前七行騷人聊自怡刊本怡訛娛
據松陵集改

第十七頁前三行化工杳幽香刊本化訛畫據宋
詩本改

第二十一頁前八行一枝解奪千姝媚刊本媚訛
麗據明詩改





總校官庶吉士臣侍朝

校對官編修臣王福清

謄錄監生臣浦煒

欽定四庫全書薈要

子部

御定廣羣芳譜卷四十一

詳校官主事_臣陳木

欽定四庫全書薈要卷一萬六百四子部

御定佩文齋廣羣芳譜卷四十一

花譜

山茶

茶一名曼陀羅樹高者丈餘低者二三尺枝幹交

加葉似木樨硬有稜稍厚中濶寸餘兩頭尖長三寸許

面深綠光滑背淺綠經冬不脫以葉類茶又可作飲故

得茶名花有數種十月開至二月有鶴頂茶

大如蓮紅如血中心



塞滿如鶴頂來紅黃白粉為心大寶珠茶千葉
自雲南曰滇茶紅為盤座自温州攢簇

色深楊妃茶單葉花開焦萼白寶珠似寶珠而葉白九
少態早桃紅色月開花香可愛

正宮粉賽宮粉皆粉紅色石榴茶中有碎花青蒂
而小菜榴茶

躑躅茶類山躑躅真珠茶串珠茶粉紅色又有雲茶磬口茶茱

莉茶一捻紅照殿紅郝經詩注云山茶大者曰千葉紅
月丹又大者曰照殿紅

千葉白之類葉各不同或云亦有黃者不可勝數就中寶珠為佳蜀

茶更勝虞衡志云廣州有南山茶花大倍中州色微淡

葉薄有毛結實如梨大如拳有數核如肥皂子大于若

瀛云寶珠山茶千葉含苞歷幾月而放殷紅若丹最可愛聞滇南有二三丈者開至千朶大于牡丹皆下垂稱絕豔矣 增雲南志土產山茶花謝肇淞謂其品七十有二趙壁作譜近百種大抵以深紅軟枝分心卷瓣者為上 原紅花為末入薑汁童便酒調服治吐血衄血下血可代鬱金研末麻油調塗湯火傷灼

彙考增劔南詩注成都海雲寺山茶一樹千葉特為繁麗 海雲寺山茶開故事宴集甚盛 花經山茶七品

三命 瓶花譜黃白山茶二品八命蜀茶三品七命

光福山記海雲院有連理山茶 原學圃餘疏潯陽陶

狄祠山茶一株幹大盈抱枝蔭滿庭二月三日祭時花

特盛好事者分種之竟無一活紹興曹娥廟亦有之止

如拱把之半土人云千年外物也 黃山茶白山茶紅

白茶梅皆九月開二山茶花大而多韻亦茶中之貴品

楊妃山茶稍後與白菱同時開楊妃是淡紅殊不為佳

為是冬初花當具一種耳 吾地山茶重寶珠有一種

花大而心繁者以蜀茶稱然其色類殷紅嘗聞人言滇
中絕勝余官莆中見士大夫家皆種蜀茶花數千朶色
鮮紅作密瓣其大如杯云種自林中丞蜀中得來性特
畏寒又不喜盆栽余得一株長七八尺昇歸植澹園中
作屋幕于隆冬春時折去蘂多輒摘却僅留二三花更
大 增閩部疏滇茶不寶珠而色鮮好嬌于寶珠茶其
大如筮瓣有重臺交覆可當芍藥莆人林大輅中丞官
彼帶一株歸今傳種家有之開時千朶艷發綠葉掩映

大是佳卉 瓶史山茶鮮妍石氏之翾風羊家之靜婉

也 黃白山茶韻勝其姿郭冠軍之春風也 滇中茶

花記茶花最甲海內種類七十有二冬末春初盛開大

於牡丹一望若火齊雲錦爍日蒸霞南城鄧直指有茶

花百韻詩言茶有數絕一壽經三四百年尚如新植一

枝幹高竦四五丈大可合抱一膚紋蒼潤黯若古雲氣

罇壘一枝條黝糾狀如麈尾龍形一蟠根輪囷離奇可

憑而几可藉而枕一豐葉森沉如握一性耐霜雪四時

常青一次第開放歷二三月一水養瓶中十餘日顏色
不變 滇雲紀勝書山茶花在會城者以沐氏西園為
最西園有樓名簇錦茶花四面簇之凡數十樹樹可三
丈花簇其上樹以萬計紫者朱者紅者紅白兼者映目
如錦落英鋪地如坐錦茵此一奇也僕嘗以花時登簇
錦賞之有十丈錦屏開綠野兩行紅粉擁朱樓之句及
登太華則山茶數十樹羅殿前樹愈高花愈繁色色可
念不數西園矣 滇南太華山記兩坪山茶樹八本皆

高二丈餘枝葉團扶萬花如錦

集藻賦增宋黃庭堅白山茶賦并序姨母文城君作白山茶賦興寄高遠蓋以自況類楚人之橘頌感之作後白山茶賦孔子曰歲寒然後知松栢之後凋也麗紫妖紅爭春而取寵然後知白山茶之韻勝也此木產于臨川之崔嵬是為麻源第三谷仙聖所廬金堂瓊榭故是花也稟金天之正氣非木果之匹亞乃得骨于崑閬非乞靈于施夏造物之手執丹青而無所用析薪之斤雖

睥睨而幸見赦高潔皓白清修閑暇裴回冰雪之晨偃
蹇霜月之夜彼細腰之子孫與莊生之物化方培戶以
思溫故無得而陵跨蓋將與日月爭光何苦與洛陽爭
價惟是當時而見尊顯處于瑤臺玉墀之上是以閑藏
而無悶淡然于乾楓枯柳之下江北則上徐庾江南則
數鮑謝蓋不能刻畫嫦娥藩飾姑射諒無地以寄言故
莫傳于膾炙况乎見素抱朴難乎郢人故徐熙趙昌舐
筆和鉛而不敢畫或謂山丹之皓質足以爭長而更霸

老四十一
知我如此不幾乎罵雖瓊華明后土之祠白蓮秀遠公
之社皆聲名籍甚俗態不捨挾脂粉之氣而蘊蘭麝與
君周旋其避三舍

五言古詩增宋梅堯臣山茶花樹子贈李廷老南國有
嘉樹華若赤玉杯曾無冬春改常冒霰雪開客從天目
來移此瓊與瑰贈我居大梁蓬門方塵埃舉武尚有礙
何地可以栽每游平棘侯大第夾青槐朱欄植奇卉磨
碧為墜臺於此豈不宜亟致勿徘徊將看榮茂時莫嗤

寒園梅

和普公賦東園山茶紅鵲勝朱槿越丹看更

大臘月冒寒開楚梅猶不柰曾非中土有流落思江外

蘇軾王伯馭所藏趙昌山茶蕭蕭南山松黃葉隕勁

風誰憐兒女花散火冰雪中能傳歲寒姿古來惟丘翁

趙叟得其妙一洗膠粉空掌中調丹砂染此鶴頂紅何

須誇落墨獨賞江南工原徐致中山茶山茶本晚出

舊不聞圖經花深嫌少態曾入蘇公評邇來亦變怪紛

然著名稱黃香開最早與菊為輩朋粉紅更妖嬈玉環

帶春醒偉哉紅百葉花重枝不勝尤愛南山茶花開一
尺盈月丹又其亞不減紅帶韎吐絲心抽鬚鋸齒葉翦
稜白茶亦數品玉磬尤晶明桃葉何處來派別疑武陵
愈出愈奇怪一見一歎驚 增明釋道衍茶軒為陳惟
寅賦千苞凜冰雪一樹當窻几晴旭曉微烘遊蜂掠芳
蘂澹香勻密露繁艷照煙水幽人賞詠遲每恨殘紅委
七言古詩增宋曾鞏山茶花山茶花開春未歸春歸正
值花盛時蒼然老樹皆誰種照耀萬朶紅相圍蜂藏鳥

伏不得見東風用力先吹噓追思前者葉蓋地萬木慘
慘攢空枝寒梅數綻小顏色霰雪滿眼常相迷豈如此
花開此日絳艷獨出凌朝曦為憐勁意似松柏欲攀更
惜長依依山榴淺薄豈足比五月霧露空芳菲 明蘇

伯衡中丞劉先生齋閣前山茶一枝並蒂因效柏梁體
朔風翦冰雨雪雱萬木蕭條凍且僵青藜丈人鈴閣傍
山茶作花紅錦妝中有一枝並蒂香符彩爛若雙鴛鴦
嫣然占盡三春光皇英來自雲中央赤旗翠節兩作行

阿母笑執瑤池觴仙童雙雙吹鳳凰綵女齊綰珊瑚璫
麗色照耀青霞裳芳氣氤氲滿中堂大君尺劒空八荒
牛歸桃林馬華陽百度既貞四維張禮樂誰云謙未遑
制作直欲追虞唐丈人今之杜與房主臣合德真明良
朝夕左右扶維綱餘子議論安敢當一朝嘉惠錫后皇
乃是人文發禎祥玉局仙子喜欲狂更祝人文壽而康
黼黻鴻猷煥天章嘉樹呈瑞垂無疆

五言律詩增宋朱長文次韻司封使君和練推官再詠

山茶珍木何年種繁英滿舊枝開從殘雪裏盛過牡丹
時對日心全展凌風幹不歌藥階如賦詠欠此尚相思
七言律詩增宋曾鞏以白山茶寄吳仲庶山茶純白是
天真筠籠封題摘尚新秀色未饒三谷雪清香先得五
峰春瓊花散漫情終蕩玉蘂蕭條跡更塵遠寄一枝隨
驛使欲分芳種更無因 原蘇軾和子由開元寺山茶
舊無花今歲盛開長明燈下石闌干長共松杉鬪歲寒
葉厚有稜犀甲健花深少態鶴頭丹久陪方丈曼陀雨

羞對先生苜蓿盤雪裏盛開知有意明年歸後更誰看

增蘇轍宛丘開元寺殿下山茶一株數年不開頃從

子瞻遊此每以為恨今二月中山茶開千餘朵因作詩
奉寄古殿山花叢百圍故園曾見色依依凌寒強比松
筠秀吐艷空驚歲月非冰雪紛紜真性在根株老大衆
緣稀山中草木誰攜種潦倒塵埃不復歸 謝邁玉茗

花佳園昨夜變春容清曉驚開玉一叢素質定欺雲液
白淺妝羞退鶴翎紅似聞金谷初無種欲畫鵝溪恐未

工底事餘花避三舍孤高元有使君風 騷人漫說麻

源谷本在風流刺史家直與瑤林共高徹可須梅影闌
橫斜芳尊莫待紅妝賞幽艷長令烈士嗟憑仗邊鸞折
枝手應宜展障玉鴉叉 范成大十二月十八日海雲

賞山茶追趁新晴管物華馬蹏鬆快帽檐斜天南臘盡
風晞雪冰下春來水漱沙已報主林催市柳仍從掌故
問山茶豐年自是歡聲沸更著牙前畫鼓撾 十一月
十日海雲賞山茶門巷歡呼十里村臘前風物已知春

兩年池上經行處萬里天邊未去人客鬢花身俱歲晚
妝光酒色且時新海雲橋下溪如鏡休把冠巾照路塵
原楊萬里山茶樹子團團映碧岑初看喚作木犀林
誰將金粟銀絲贈簇飮朱紅菜碗心春早橫招桃李妬
歲寒不受雪霜侵題詩畢竟輸坡老葉厚有稜花色深
王十朋族兄文通贈山茶野性無端喜種花吾兄得
得贈山茶鶯聲老後移雖晚鶴頂丹時看始佳雨葉鱗
鱗成小蓋春枝艷艷首羣葩自慙欲報無瓊玖來往同

看本一家

劉克莊山茶青女行霜下曉空山茶獨殿

衆花叢不知戶外千林縞且看盆中一本紅性晚每經
寒始拆色深却愛日微烘人言此樹尤難養暮溉晨澆
自課童 增元郝經月丹小艇移來江漲橋盤盤矮矮
格仍嬌丹霞皺月瑤紅玉香霧凝春翦絳綃一種是花
偏富貴三冬無物比妖嬈廣寒記憶曾攀折滿殿光搖
照紫霄

五言絕句原明于若瀛山茶丹砂點雕藥經月獨含苞

既足風前態還宜雪裏嬌
增陳淳山茶丹葩間碧葉
雪中自重疊山人倚醉時
柰可映頰頰窮冬多雪霰
柔脆已先摧不是丹砂質
寧能醉後開

七言絕句原宋陶弼山茶淺為玉茗深都勝
大白山茶小海紅名譽漫多朋
援少年年身在雪霜中江南池

館厭深紅零落空山烟雨中
却是北人偏愛惜數枝和雪上屏風
蘇軾邵伯梵行寺山茶山茶相對阿誰栽
細雨無人我獨來說似與君君不會
爛紅如火雪中開

趙昌山茶游蜂掠盡粉絲黃落葉猶收蜜露香待得

春風幾枝在年來殺菽有飛霜 增范成大玉茗花折

得瑤華付與誰人間鉛粉弄妝遲直須遠寄驂鸞客鬢

腳飄飄可一枝 陸游山茶一樹自冬至清明後著花

不已東園三日雨兼風桃李飄零掃地空惟有小茶偏

耐久綠叢又放數枝紅 山茶雪裏開花到春晚世間

耐久孰如君憑闌歎息無人會三十年前宴海雲 原

俞國寶花近東溪居士家好攜樽酒款攜茶玉皇收拾

還天上便恐筠陽無此花 玉潔冰寒自一家地偏驚

對此山茶歸來不負西游眼曾識人間未見花 增金

段克己山茶雪孃子宮中儀體新八姨羞把舊妝勻畫

羅瑞錦難相稱故著龍香簇絳巾 元馬祖常趙中丞

折枝山茶火齊珠紅拂翠翅石家步障曉寒消千枝蠟

炬燒春夜羯鼓催花打六么 薩都刺阻風南露筋過

羅漢寺看山茶野寺尋春酒未醒不知幾日過清明小

闌干外東風急一樹山茶落晚晴 明沈周白山茶犀

甲凌寒碧葉重玉杯擎處露華濃何當借壽長生酒只

恐茶仙未肯容

紅山茶老葉經寒壯歲華猩紅點點

雪中葩願希葵藿傾忠膽豈是爭妍富貴家 原張新

寶珠茶臘脂染就絳裙襴琥珀裝成赤玉盤似共東風

解相識一枝先已破春寒

楊妃茶曾將傾國比名花

別有輕紅暈臉霞自是太真多異色品題兼得重山茶

詩散句原宋張舜民葉硬經霜綠花肥映雪紅

增僧

惠洪千朵鶴頂紅染此叢間綠

明沈周雪後無顏色

凌寒見此花 原宋王十朋道人贈我歲寒種不是尋

常兒女花 曾季狸惟有山茶殊耐久獨能深月占春

風 無名氏勁節不摧岷嶺雪芳姿偏受建溪風 元

邨經秦樹怨離拋翡翠漢宮愁絕冷臙脂

別錄增葯圃同春蜀茶紅白二色清而喜腴秋時用烏

豆水灌之其花益妍 原栽接春間臘月皆可移栽四

季花寄枝宜用本體黃花香寄枝宜用茶體若用山茶

體花仍紅色白花寄枝同上一種玉茗如山茶而色白

黃心綠萼磬口花皂口花宜子種以單葉接千葉者則花盛樹久以冬青接十不活一

蠟梅

增本草蠟梅一名黃梅花

黃庭堅詩序云香氣似梅類女工撚蠟所成京洛人因謂

蠟梅范成大梅譜云本非梅類以其與梅同時而香又相近色酷似蜜脾故名蠟梅王世懋學圃餘疏云考蠟梅原名黃梅故王安國熙寧間尚詠黃梅至元祐間蘇黃命為蠟梅人言臘時開故名臘梅非也為色正似黃耳

原蠟梅小樹叢枝尖葉木身與葉類桃而濶大尖

硬花亦五出色欠晶明以子種出經接過花疎雖盛開

常半含名磬口梅

梅譜云言似僧磬之口也學圃餘疏云出河南花史云楚中荆襄者最佳

色深黃圓瓣如白梅若瓶一枝香可盈室

次曰荷花

學圃餘疏云出松江花史云瓣有微尖形似荷

花

又次曰九英

梅譜云子種不經接花小香淡其品最下謂之狗蠅後訛為九英

又有

開最先色深黃如紫檀花密香濃名檀香梅此品最佳此花多宿葉結實如垂鈴尖長寸餘子在其中

彙考增王直方詩話蠟梅山谷初見之戲作二絕緣此盛於京師原梅譜蠟梅香極清香殆過於梅初不以形狀貴也故難題詠山谷簡齋但作五言小詩而已

增賓朋宴語王直方父家多侍兒而小鬟素兒尤妍麗
王嘗以蠟梅花送晁無咎無咎以詩謝之有云芳菲意
淺姿容淡憶得素兒如此梅 竹坡詩話東南有蠟梅
蓋自近時始余童時猶未之見元祐間魯直諸公方有
詩前此未嘗有賦此詩者政和間李端叔在姑谿元夕
見之僧舍中嘗作兩絕其後篇云程氏園當尺五天千
金爭賞凭朱欄莫因今日家家有便作尋常兩等看觀
端叔此詩可以知前日之未嘗有也 梅溪詩注東南

蠟梅葉落始開峽中地暖花開而葉不落 三柳軒雜

識姚氏殘語以蠟梅為寒客今改為久客 花經蠟梅

一品九命 瓶史浴蠟梅宜清瘦僧然寒花性不耐浴

當以輕綃護之 蠟梅以水仙為婢 京口諸山記焦

山觀音閣蠟梅一株輕風翩反若傳隱士神者

集藻七言古詩原宋蘇軾蠟梅一首贈趙景貺天工點

酥作梅花此有蠟梅禪老家蜜蜂採花作黃蠟取蠟為

花亦其物天工變化誰得知我亦兒嬉作小詩君不見

萬松嶺上黃千葉玉蘂檀心兩奇絕醉中不覺度千山

夜聞梅香失醉眠歸來却夢尋花去夢裏花仙覓奇句

此間風物屬詩人我老不飲當付君君行適吳我適越

笑指西湖作衣鉢 陳師道和蘇公蠟梅化人巧作細

樣花何年落子空王家羽衣霓裳浣香蠟從此人間識

尤物青瑣朱郎却未知天公下取仙翁詩烏丸雞距寫

玉葉却怪寒花未清絕北風驅雪度關山把燭看花夜

不眠明朝詩成公亦去長使詩仙誦佳句湖山信美更

須人已覺西湖屬此君坐想明年吳興越行酒賦詩聽

擊鉢 陳與義蠟梅智瓊額黃且勿誇回眼視此風前

葩家家融蠟作杏蒂歲歲逢梅是蠟花世間真偽非兩

法映日細看真是蠟我今嚼蠟已甘腴況此有韻蠟不

如只愁繁香欺定力薰我欲醉須人扶不辭花前醉倒

臥經月是酒是香君試別 增周必大次韻王龜齡省

中黃梅化工未約醑醑菊先放細梅伴羣玉幽姿著意

慕鉛黃正色何心輕萼綠妝成自淺風味深對此寧辭

食無肉可憐涪翁被渠惱中歲梅屏枯杓醪 楊萬里

蠟梅次坡公韻梅花已自不是花冰魂謫墮玉皇家不
餐煙火更餐蠟化作黃姑瞞造物後山未覺坡先知東
坡勾引後山詩金花勸飲金荷葉兩公醉吟許孤絕人
間姚魏漫如山令人眼暗只欲眠此花寒香來又去惱
損詩人難覓句月魚花影却三人欠箇文同作墨君吾
詩無復古清越萬水千山一瓶鉢 劉詵和羅昌逢蠟
梅梅兄不見今幾時黃塵盡浣冰玉姿却疑來從金仙

國已覺顏貌俱近之水邊林下恍如昨都非都似驚相
嬉額黃萬斛塗未了頰怒半落宮簷枝縹裾下壓紺裙
裼紺袖醉枕紅膚脂天寒鵝兒凍凝酒日明蜂戶光分
脾暗香著人欲襲骨妙意未必和靖知小窓靜晝膽瓶
古長廊微雪珠簾垂一枝几案誰所置便覺春意生
睂勿嫌吟詩苦不似酒觴更倒黃金卮

五言律詩增宋尤袤蠟梅破臘驚春意凌寒試曉妝應
嫌脂粉白故染麴塵黃綴樹蜂懸室排筍鴈著行團酥

與凝蠟難學是生香 原楊萬里蠟梅粟玉圓彫蕾金
鐘細著行來從真臘國自號小黃香夕吹撩寒馥晨曦
透暖光南枝本同姓喚我作他楊 增朱子蠟梅風雪
催殘臘南枝一夜空誰知荒草裏却有暗香同姿瑩輕
黃外芳騰淺絳中不遭岑寂侶何以媚芳叢

七言律詩增宋王安國黃梅花庾嶺時開媚雪霜梁園
春色占中央莫教鶯過毛無色已覺蜂歸蠟有香弄月
似浮金屑水飄風如舞麴塵場何人剩著栽培力太液

池邊想菊裳

陸游荀秀才送蠟梅與梅同譜又同時

我為評香似更奇
痛飲便判千日醉
清狂頓減十年衰
色疑初割蜂脾蜜
影欲平欺鶴膝枝
揷向寶壺猶未稱
合將金屋貯幽姿
王十朋蠟梅天工著
意點駝酥不與江梅鬪
雪膚露滴蜂房釀
崖蜜日烘龍腦噴
金爐萬松張蓋黃尤好
三峽藏春綠不枯
題品倘非坡與谷
世人應作小蟲呼
原樓鑰詠蠟梅水仙二妹巧笑出蘭房
玉質檀姿各自芳
品格雅稱仙子態
精神疑著道家

黃宮妃漫詫凌波步漢殿徒翻半額妝一味真香清且
絕明窓相對古冠裳 增金趙秉文古瓶蠟梅石冷銅
腥苦未清瓦壺溫水照輕明土花暈碧龍紋澀燭淚痕
疎鴈字橫未許功名歸鼎鼐且收風月入瓶罌嬌黃喚
醒朝陽夢漢苑荒涼草棘生 元耶律楚材蠟梅越嶺
仙姿迴異常洞庭春染六銖囊枝橫碧玉天然瘦蕾破
黃金分外香反笑素英渾淡抹却嫌紅艷太濃妝臨風
浥此薔薇露醉墨淋漓寄渺茫

五言絕句原宋黃庭堅戲詠蠟梅二首金蓓鎖春寒惱
人香未展雖無桃李顏風味極不淺 體熏山麝臍色

染薔薇露披拂不滿襟時有暗香度 陳師道蠟梅異

色深宜晚生香故觸人不施千點白別作一家春 增

陳師道和豫章公黃梅寒裏一枝春白間千點黃道人
不好色行處若為香 色輕花更艷體弱香自永玉質

金作裳山明風弄影 舊鬢千絲白新梅百葉黃留花

如有待迷國更煩香 冉冉梢頭綠婷婷花下人欲傳

千里信暗折一枝春
黃裏含真意春容帶薄寒欲知
誰稱面偏插一枝看
花裏重重葉釵頭點點黃祇應
報春信故作著人香
原陳與義蠟梅黃羅作廣袂絳
帳作中單人間誰敢著留得護春寒
一花香十里更
值滿枝開承恩不在貌誰敢鬪香來
增陳與義蠟梅
朱朱與白白著意待春開那知洞房裏已傍額黃來
花房小如許銅砌黃金塗中有萬斛香與君細細輸
來從底處所黃露滿衣濕緣慙翻得憐亭亭倚風立

奕奕金仙面排行立曉晴殷勤夜來雪小佳作珠纓
亭亭金步搖朝日明漢宮當時好光景一似此園中
韻勝誰能舍色莊那得親朝陽一映樹到骨不留塵
王十朋蠟梅蝶採花成蠟還將蠟染花一經坡谷眼名
字壓羣葩

七言絕句原宋黃庭堅從張仲謀乞蠟梅聞君寺後野
梅發香蜜染成官樣黃不擬折來遮老眼欲知春色到
池塘天工戲翦百花房奪盡人工更有香埋玉地中

成故物折枝鏡裏憶新妝

臥雲莊上梅花發香似早

梅開不遲淺色春衫弄風日遺來當為作新詩 增晁

補之謝王立之送蠟梅五首未教落素混冰池且看輕

黃綴雪枝越使可因千里致春風元自未曾知 恐是

凝酥染得黃月中清露滴來香定知何遜牽詩興借與

穿簾一點光 上林初就召羣臣紫蒂同心各自新誰

見小園春雪裏破春一萼更驚人 詩報蠟梅開最先

小奩分寄雪中妍水村映竹家家有天漢橋邊絕可憐

去年不見蠟梅開
準擬新年恰恰來
芳菲意淺姿容

淡憶得素兒如此梅
晁沖之和王立之蠟梅茅簷竹

塢兩幽竒岸幘尋花醉
亦知崖蜜已成蜂
去盡夜寒惟

有露房垂
老去攀翻興益奇
招攜風月作新知
但令

春釀常如此
百罰深杯亦倒垂
荼蘼架倒花仍發
薜

荔牆摧石亦移
此地與君凡幾醉
年年同賦蠟梅詩

步屨穿花醉晚風
翻枝摘葉興何窮
他年上苑求佳種

越白江紅掃地空
原韓駒蠟梅路入君家
百步香隔

簾初試漢宮妝只疑夢到昭陽殿一簇輕紅統淡黃

增張孝祥蠟梅滿面宮妝淡淡黃絳紗封蠟貯幽香遙

憐未識花消息乞與一枝收斷腸周必大蠟梅繭黃

織就費天機付與園林晚出枝詩老品題猶誤在紅梅

未是獨開遲范成大從巨濟乞蠟梅寂寥人在曉雞

窓苦憶花前續斷腸全樹折來應不惜君家真色自生

香次韻漢卿舅蠟梅垂垂瘦萼泣微霜翦翦纖英鎖

暗香金雀釵頭金蛺蝶春風傳得舊宮妝湘袂朝天

紫錦裳光風微度絳霄香壽陽信美無仙骨空把心情

學澹妝 楊萬里蠟梅江梅珍重雪衣裳薄相紅梅學

杏裝渠獨小叅黃面老額間艷艷發金光 蜜蜂底物

是生涯花作餽糧蠟作家歲晚畧無花可採却將香蠟

吐成花 天向梅梢別出奇國香未許世人知殷勤滴

蠟絨封却偷被霜風折一枝 香蜜栽葩分外工疎枝

數點綴雛蜂嬌黃染就宮妝樣香暖猶宜愛日烘 王

十朋蠟梅劉郎不獨種桃花蠟藥柔香更可佳臭味相

同林下友從今花木亦通家
謝翱蠟梅冷艷清香受

雪知雨中誰把蠟為衣
蜜房做就花枝色留得寒蜂宿
不歸
吳永齋蠟梅惹得西湖處士疑
如何顏色到鵝

兒清香全與江梅似
只欠橫斜照水枝
原金趙伯成

蠟梅二首凍蕾含香蠟點勻
古來幽谷有佳人
詩家只

怨和羹晚不道紅梅別是春
冷艷疎香寂寞濱
欲持

何物向時人
東風自是清狂手
辦作竹籬茅舍春
增

元耶律楚材謝王巨川惠蠟梅
雪裏冰枝破冷金前村

籬落暗香侵令人多謝王公子分惠幽芳寄好音
馮
子振蠟梅洗却鉛膏飾道裝檀心淺露紫香囊從今宮
額翻新樣變作睂間一點黃

詩散句增宋曾肇紫蒂黃苞破臘寒清香旋逐角聲殘
李廌底處嬌黃蠟樣梅幽香解向北寒開 蘇伯業
花鬚醞蜜共稱美蜜脾翦花噴沉水 周必大東觀奇
童承詔後南昌故尉欲仙時

詞原宋王十朋點絳唇蠟換梅姿天然香韻初非俗蝶

馳蜂逐蜜在花梢熟 巖壑深藏幾載甘幽獨因坡谷

一標題目高價掀蘭菊 李芸子卜算子蜜葉蠟蜂房

花下頻來往不知辛苦為誰甜山月梅花上 玉質紫

金衣香雪隨風蕩人間喚作返魂梅仍是蜂兒樣 韓

元吉菩薩蠻江南雪裏花如玉風流越樣新裝束恰恰

縷金裳濃薰百和香 分明籬菊艷却作梅妝面無處

柰君何一枝春已多 趙彥端好事近一種歲前春誰

辨額黃腮白風意只吟羣木與此花全別 此花佳處

似佳人高韻帶詩格君子歲寒相許有芳心難結 馬

莊父浪淘沙嬌額尚塗黃不入時妝十分輕脆柰風霜
幾度細腰尋得蜜錯認蜂房東閣久淒涼江路悠長
休將顏色較芬芳無柰世間真若偽賴有幽香 毛滂
踏莎行粟玉玲瓏甕酥浮動芳跗染得臙脂重風前蘭
麝作香寒枝頭煙雪和春凍 蜂翅初開蜜房香弄佳
人寒睡愁如夢鵝黃衫子茜羅裙風流不與紅梅共
馬莊父破陣子點綴莫窺天巧名稱却道人為香醞蜜

脾分幾點色映烏雲倚一枝遙看倒透遲映水不嫌

疎影嬌春也自同時紅樹落殘風乍暖塞管聲長曉更
催此花知不知葉夢得千秋歲曉煙溪畔曾記東風

面化工與重裁翦額黃明艷粉不共妖紅軟凝露臉多

情正似當時見誰向滄波岸特地移閒館情一縷愁

千點煩君搜妙語為我催清燕須細看紛紛亂藥空凡

艷吳文英天香蟬葉粘霜蠅苞綴凍生香遠帶風峭

嶺上寒多溪頭月冷枝北瘦枝南小玉奴有姊先占立

墻陰春蚤初試宮黃淡泊偷分壽陽纖巧 銀燭淚珠

未曉酒鍾慳貯愁多少記得短亭歸馬暮衙蜂鬧豈
釵頭恨裏但悵望天涯歲華老遠信難封吳雲鴈杳

增張翥水龍吟玉人梳貌堪憐曉妝一洗鉛華盡此花
應是菊分顏色梅分風韻萼點駝酥口攢金磬心凝檀
粉甚女貞染就仙衣絕勝蜂兒重鵝兒嫩 說與玉龍
莫品怕宮波一般流恨故人堪寄折枝代取江南春信
沉水金薰蘂絲密綴額黃深暈乍燕姬未識是花是蠟

笑俚人問

別錄原取用物類相感志蠟梅樹皮浸水磨墨發光彩
本草花氣味辛溫解暑生津 禁忌花史蠟梅人多

愛其香但可遠聞不可近嗅嗅之頭痛屢試不爽 種
植子既成試沉水者種之秋間發萌放葉澆灌得宜四
五年可見花 一法取根旁自出者分栽易成樹

瑞香

原瑞香一名露甲一名蓬萊紫一名風流樹高者三四

尺許枝幹婆娑柔條厚葉四時長青葉深綠色有楊梅
葉枇杷葉荷葉攣枝冬春之交開花成簇長三四分如
丁香狀共數種有黃花紫花白花粉紅花二色花梅子
花串子花皆有香惟攣枝花紫者香更烈枇杷葉者結
子其始出於廬山宋時人家種之始著名攣枝者其節
攣曲如斷折之狀其根綿軟而香葉光潤似橘葉邊有
黃色者名金邊瑞香枝頭甚繁體幹柔韌性畏寒冬月
須收暖室或窖內夏月置之陰處勿見日此花名麝囊

能損花宜另種

彙考原清異錄廬山瑞香花始緣一比丘晝寢盤石上
夢中聞花香酷烈及覺求得之因名睡香四方奇之謂
為花中祥瑞遂名瑞香 增花經紫風流一品九命

三餘贅筆曾端伯以瑞香為殊友張敏叔以瑞香為佳
客 灌園史瑞香名始於廬山比丘則似前此未之有
矣乃楚辭所載露甲或復以瑞香當之是時佛教未東
豈得先有比丘耶意此花本名露甲至有廬山一事始

易今名耳

集藻序原宋呂大防瑞香圖序瑞香芳草也其木高纔數尺生山坡間花如丁香而有黃紫二種冬春之交其花始發植之庭檻則芳馨出於戶外野人不以為貴宋景文亦闕而不載予令春城後二十年守成都公庭僧圃靡不有也予恐其沒於草一日見知於時殆與人事無異感而圖之因為之序

五言古詩原宋蘇軾次韻曹子方龍山真覺院瑞香花

幽香結淺紫來自孤雲岑骨香不自知色淺意殊深移
栽青蓮宇遂冠薜蘿林紉為楚臣佩散落天女襟君持
風霜節耳聆歌笑音一逢蘭蕙質稍回鐵石心置酒要
妍暖養花須晏陰及此陰晴間恐致慳嗇霖絲雲知易
散鶚鴝憂先吟明朝便陳迹試著丹青臨 增葉適新
移瑞香舊曾作文忘之因今追憶云一株當三春名花
不易得百年等尋丈不博千乘國野人三十本強賣青
銅百應憐跼蹐具苦為薪米迫移栽向明陽妃媛儼行

列土膏合根性功用成夙昔除香出淺紫泣露輕脉脉
含愁欲誰訴折去情更惜方求蔽蒂陰未受搔擢厄嗟
余自羈旅何以慰新客殷勤深夜來少待山月白

七言古詩增宋范成大瑞香花萬粒叢芳破雪殘曲房
深院閉春寒紫紫青青雲錦被百疊薰籠晚不翻酒惡
休拈花蘂嗅花氣醉人醺勝酒大將香供惱幽禪恰在
蘭枯梅落後 明宣宗瑞香花瑞香花葉如織其葉非
一狀花開亦殊色或如碼碯之殷紅或如玉雪之姿容

或含淺絳或深紫細蕤疊萼芬玲瓏臘後春前花未放
先春獨占梅花上繞枝芳意露綰萬卉千葩總相讓
矐矐旭日照堦墀淡蕩春風拂面時初疑沉檀爇寶鼎
亦似蘭麝薰人衣瑞香花樹高三尺強山桃野杏動踰
丈得以幽叢約馥香

五言律詩原宋楊萬里詠瑞香外著明霞綺中裁淡玉
紗森森千萬筍旋旋兩三花小霽迎風喜輕寒索幙遮
香中真上瑞蘭麝敢名家短短薰籠小團團錦帕圍

浮陽烘酒思沉水著人衣茉莉通家遠椒花具體微春

愁渾瘦盡別有瘦中肥 增僧惠洪次韻真覺大師瑞

香花淺色映華堂清寒熏夜香應持燕尾翦破此麝臍

囊有恨成春睡無人見洗妝故山煙雨裏寂寞為誰芳

七言律詩原宋蘇軾刁景純賞瑞香花憶先朝侍宴次

韻上苑夭桃自作行劉郎去後幾回芳厭從年少追新

賞閒對宮花識舊香欲贈佳人非汎洎好紉幽佩弔沉

湘鶴林神女無消息為問何年返帝鄉 增周必大次

韻楊廷秀待制瑞香花灞橋忍凍兩相攢漢殿含春別

一般粉面固宜垂紫袖錦裳何必著中禪禁庭侍史今

同宿宮帽花枝故自欒咀嚼新詩懷舊直刺貪寧不愧

河檀 原楊萬里瑞香花侵雪開花雪不侵開時色淺

未開深碧團團裏筍成束紫蓓蕾中香滿襟別派近傳

廬阜頂孤芳元是洞庭心詩人自有薰籠錦不用衣篝

炷水沉 瑞香花盛開呈周益公二首近看丁香萬粒

攢遠看却與紫球般誰將玉膽薔薇水新濯瓊膚錦繡

禪淨界薰修爾芳馥無人翦剔自檀欒下元前至上元

後省得龍沉與麝蘭 鉞來大筍束仍攢作麼開時色

兩般荀令金爐炷沉水昭容紫袖襯中禪同花異葉株

株異一種欒枝節節欒雪裏寒香得三友溪邊梅與雪

邊蘭 增方岳種瑞香花自種幽香傍短檣荷鋤正用

雨冥冥山家安得瑞龍腦春事不專紅鶴翎持向東風

論甲乙與遮西日費丁寧何年得似熏籠錦茗盃時時

為乞靈 原劉克莊謝太守送瑞香花一樹婆娑整復

斜使君輟贈到田家自慙甕牖繩樞子不稱香囊錦傘

花小借暖風為破萼旋澆新水待抽芽丁寧兒子勤封

植留與甘棠一樣誇 朱淑真詠瑞香玲瓏巧感紫羅

裳令得東君著意妝帶露欲開宜暖日臨風微困怯春

霜發揮名字來廬阜彈壓芳菲入醉鄉最是午牕初睡

醒熏籠贏得夢魂香 增元郝經孟少保後園瑞香羽

葆層層擁細花甲梅斜映隔山茶兩三叢裏氤氲氣數

百年來富貴家雕玉香濃團瑞雪翠翹春暖插輕霞主

人一去無消息庭戶蕭疎落晚鴉
明陳憲章次韻張

廷寶瑞香花開有懷三徑歸來闢草萊偶逢名士乞花

栽莫愁冷艷無人愛正遞寒香別圃開年光暗逐東流

水春信纔通半樹梅必有比鄰高二仲手捫花樹共徘徊

徊

五言絕句增宋陳造瑞香花鈎窓玩孤芳殘月衣上明

紫囊拆蘭麝小風弄初晴
范成大瑞香三首小檻移

秀色端來媚禪房道人不解飲醺然醉天香
紫雲蹙

繡被團圓覆衣篝濃薰百和韻香極却成愁 一叢三

百朶細細拆濃檀簾幕護花氣不知窓外寒 原王十

朋瑞香花真是花中瑞本朝名始聞江南一夢後天下

仰清芬 增明陳淳題瑞香花穠香折麝臍細藥秀鶴

頂東風故飄蕩薰人醉不醒

七言絕句原宋楊萬里瑞香花纖錦天孫矮作機紫茸
翻了白花枝更將沉水濃薰却日淡風微欲午時 移
瑞香花斛夜綴香窠沐露華晝移翠斛馥牕紗將身扶

起簾帷看生怕簾帷挨著花 鄭清之瑞香粉面芳心

碧玉裳持來宛作故山香征途不覺春如許更問蘭芽

幾寸長 白氏集詠紫瑞香廬阜當年春睡濃花名從

此擅春工紫葩四迸呈鮮粉如熟仙香透錦籠 白瑞

香繁花簇粉烘晴日藹有濃香透暖風六曲闌干凝睇

處錦籠爭似玉為籠 增元楊維禎瑞香花一團華蓋

翠亭亭萬箇丁香露欲零日炙錦薰眠不得玉人扶起

酒初醒

詩散句增宋蘇籀芳蕤何倩綯尤物真旖旎五葉映雕

闌三桠駢粉蘂妍分春月魂香徹肌骨髓原樵隱居

士衆妙與春競紛紛持所長此花最幽遠如以禮自將

猗蘭敢回步蘂蔔亦退藏韓駒著葉團青蓋開花炷

寶薰楊萬里紫袖染難透瓊膚曬轉香曾肇風雨

離披枝葉瘦可憐終不減清香張舜民檻中紫艷纔

盈握天上花香暗襲人陳克沉香殿裏春風早紅錦

薰籠二月時沁枝清露濯幽葩醉質爛斑襯曉霞

楊萬里齊開忽作藥枝錦未拆猶疑紫素馨 王十朋

世人競重薰籠錦子素何曾怯瑞香 劉克莊便覺麝

囊無遠韻頻挑蟻蠹有新芽 陳古澗曉露染成雞舌

紫東風吹作麝臍香 陶弼玉英金寶碧琳枝

詞原宋趙彥端點絳唇護雨烘晴紫雲縹緲來深院晚

寒誰見紅杏枝頭怨 絕代佳人萬里沉香殿光風轉

夢餘千片猶恨相逢淺 王十朋點絳唇欄檻陰沉紫

雲呈瑞餘寒凜捲簾欹枕香逼幽人寢 入夢何年廬

阜聞名稔風流甚阿誰題品喚作薰籠錦 張孝祥浣

溪沙臘後春前別一般梅花枯淡水仙寒翠雲裘裏紫

霞冠 妙品只今推第一寶香元不是人間為君更酌

小龍團 蘇軾西江月公子眼花亂發老夫鼻觀先通

領巾飄下瑞香風驚起謫仙春夢 后土祠中玉蘂蓬

萊殿裏鞵紅此花清絕更纖穠把酒何人心動 增張

掄西江月翦就碧雲鬪藥刻成紫玉芳心淺春不怕峭

寒侵暖徹薰籠瑞錦 花裏清芬獨步尊前勝韻難禁

飛香直到玉杯深
消得厭厭夜飲
原程垓瑞鷓鴣東

風冷落舊梅臺
猶喜仙花拂面開
紺色染衣春意淨
水

沉薰骨晚風來
柔條不學丁香結
矮樹仍參茉莉栽

安得方盆載幽植
道人隨處作香材
方岳水龍吟當

年睡裏聞香阿誰喚
作花間瑞巾飄沉水
籠薰古錦擁

青綾被初日酣晴
和風送暖十分清
致掩牕紗待香凝

酒醒儘消受這春思
縱把萬紅排比想較伊更爭些

子詩仙老手春風妙
筆要題教似十里揚州
三生杜牧

可曾知此趁紫脣微綻芳心半透與騷人醉 增金蔡
松年江城子慢紫雲點楓葉巖樹小婆婆歲寒節占高
潔纖苞暖釀出梅魂蘭魄照濃碧茗盃添春花氣重芸
牕晚濛濛浮霽月小眠鼻觀先通廬山夢舊清絕 蕭
閑平生淡泊獨芳溫一念猶未衰歇種種陳迹而今老
但覓茶煙禪榻寄閑寂風外天花無夢也鴛鴦債從渠
千萬劫夜寒回施幽香與愁客

別錄原栽種梅雨時折其枝插肥陰之地自能生根一

云左手折下旋即扦插勿換手無不活者一云芒種時就老枝上翦其嫩枝破其根入大麥一粒纏以亂髮插土中即活一說帶花插於背日處或初秋插於水稻側俟生根移種之移時不得露根露根則不榮澆灌瑞香惡太濕又畏日曬以燂猪湯或宰雞鵝毛水從根澆之甚肥蚯蚓喜食其根覺葉少萎以小便澆之令出即尋逐之須河水多澆之以解其醎以頭垢擁根則葉綠大槩香花怕糞瑞香為最尤忌人糞犯之輒死

附錄
結香


原結香榦葉如瑞香而枝甚柔韌可綰結花色鵝黃比
瑞香稍長開與瑞香同時花落始生葉

御定佩文齋廣羣芳譜卷四十一

謹案第八頁後六行根株老大衆緣稀刊本緣訛
園據宋詩本改

第三十四頁前二行江城子刊本城訛神據詞律
改





總校官庶吉士臣侍朝

校對官編修臣王福清

謄錄監生臣浦燊